

Den cuadro di Conferencia Internacional tocante lenga den region di Caribe

Ingles of Hulandes como lenga di instruccion na St. Eustatius?

DIAMARS 5 di augustus 09.00 or di mainta e conferencia internacional tocante lenga den region di Caribe ta cuminsa cu un presentacion di panel interesante cu lo trata e resultado di un investigacion haci recientemente na e isla di St. Eustatius. E investigacion ta tocante uzo aki como lenganan di instruccion na scol na St. Eustatius. E titulo di e presentacion ta: Uzo di linguistica na St. Eustatius y den resto di Caribe Hulandes: Con linguistanan por contribui constructivamente na debatenan tocante e idiomanan di instruccion den scolnan Caribense? E presentacion di panel aki ta den Las Palmas Ballroom di Holiday Inn Beach Resort.

Tin 4 orador den e panel. Nan ta: 1) Jenny Lozano-Cosme, estudiante PhD y docente den e seccion Ingles di Universidad

di Puerto Rico, Rio Piedras. Lozano-Cosme tin interes special den investigacion linguistico na e islanan Saba, St. Eustatius y St. Maarten. E lo elabora riba e uzo di linguistica na St. Eustatius y den resto di Caribe Hulandes. 2) dr. Ellen-Petra Kester, docente den linguistica Spaño na Universidad di Utrecht na Hulanda. Recientemente dr. Kester a conduci un investigacion tocante di sustantivo den idioma Papiamentu y riba e situacion socio-linguistico di e islanan Aruba, Bonaire y Curaçao. E lo trata uzo di idioma y actitud pa cu idioma na St. Eustatius. 3) Drs. Eric Mijts, colaborador cientifico na Universidad di Aruba. El a studia linguistica y literatura na Universidad di Antwerpen na Belgica y e ta specialisa den socio-linguistica. Drs. Mijts lo papia den e conferencia aki

riba e habilidad narativo den Ingles y Hulandes di e alumnonan na St. Eustatius. 4) Prof. dr. Nicholas Faraclas, docente den linguistica na Universidad di Puerto Rico, Rio Piedras. Despues di a ricibi su doctorado el a publica ampliamente tocante entre otro linguistica teoretico, descriptivo y social. Tambe el a investiga idiomanan di paisnan di Africa, Sur Pacifico, Latino America y Caribe. Dr. Faraclas lo expone e parti di e investigacion cu ta encera e observacionnan di les y e entervistanan cu e stakeholdernan den enseñansa na St. Eustatius.

Den su introduccion na apertura di e panel Jenny Lozano-Cosme lo amplia riba e hecho cu pa decadanan largo e discusion tocante di idioma di instruccion den enseñansa basico y secundario den Caribe den

general y den Caribe Hulandes den particular, tabata extremadamente fuerte.

Mayoria di e alumnonan na St. Eustatius (y den resto di Caribe Hulandes) ta haya nan confronta na scol cu Hulandes como lenga di instruccion, mientras cu pafo di scol nan no tin nada di haber cu e idioma aki. E uzo di Hulandes como idioma di instruccion na scol den Caribe Hulandes efectivamente ta limita e cantidad di alumnonan cu tin exito na scol. Esnan cu si ta logra na scol ta un grupo chikito cu tin mayornan cu ta capaz y dispuesto pa papia Hulandes na cas of paga bijles den Hulandes despues di scol y/of esnan cu tin capacidad y motivacion excepcional pa siña. Manera Lozano-Cosme ta splica e resto di alumnonan ta keda atras.

Pesey na 2012 Rijksdienst Caribisch Nederland a aserca e grupo di investigacion cu e peticion pa investiga y studia e beneficio- y actitudnan pa cu e idiomanan Ingles y Hulandes como lenga di instruccion den enseñansa basico, secundario y profesional riba e isla di St. Eustatius. E investigacion a dura un aña. E ekipo di investigacion a consisti di investigadonan di tres diferente universidad. Nan ta: prof. dr. Nicholas Faraclas di Puerto Rico, dr. Ellen-Petra Kester di Utrecht, Hulanda y drs. Eric Mijts di Aruba.

Den e panel diamars mainta e grupo di investigado ta presenta e resultado di su investigacion cu a keda acepta y entrega na e stakeholdernan den enseñansa na St. Eustatius den luna di januari di e aña aki.